

# RABULÈTS

A môde di rén, n'nos vola-t-i nén dins nosse cinkyinme anêye d' rêxhaedje ?

## Rènondaedje :

Oyi-da, c' èst d' pus deus mwès k' on a balziné mins on a fini pa s' décider di s' rassayî, pate-à-pate pyane myane, di lès vos continuer nos pitiéts brichâderîyes.

Èt pokwè don ? Passe ki dins lès wêres ècoradjmints k' ont arrivé, i nd' avéve deus, tinèz vos bin, d' on assèz fêl pwèd po nos rénonder : onk da Djulos Beaucarne, powête-tchanteû, l' ôte da (batême) Djozé Fontaine, fulosofe-profèsseû. Deus djins ki

n' ont nén l' êr di shûre lès minmès voyes mins ki s' sintenut bin walons èt l' dire tot wôt ! Adon pwis, wazêrêve co don s' racrapoter au culot do feû a s' plinde tot mêrseu au mitan... au mitan... d' kwè ? L' vola l' kesse ? d' timides, d' naujis, d' trop fwârts ocupés, d' disgostés, d' nawes, d' moyas ?

On s' dimande kwè, mins s' faut-i vrêmint èwarer di n' pont trover d' réponse ?

## D'on djoû à l' ôte :

-Barbara Eherenreich a dit : "L' daegne bauye divant l' fwace èt l' ritchêsse di l' Amèrike, mins, si vèla 80 au cint dès djins vikenut à leu môde c' èst bèn pace k' on n' paye k' a mitan rén lès 20 dêrins." Vêci, ça va

bèn mia, on s' va arindjî dsus l' dos dès chômeus ki n' è polenut nén mia, nonna ?

-L' Gazète do Maurdi nos aprind k' on poréve mète 45,6 miyons d' Uros d' costé po d' awè cki faut èt payî ène dringuèle di rêxhaedje aus walons députîs èt leus aspaleus ki s' vont



ritrover foû d' leus plaeces après l' vôtædje k' on va bin râde awè. Parèt minne k' i gn'a dèdjà tot cki faut pèsse dins on ridant...

-L' Picron, li, nos dit k' on paye l'an ène sakwè come 10,344 miyons d' Uros d' rintes po li Rwè èt s' famille. On a ètou cki faut pou.

-L' an passé on a pièrdû 9 miyons d' eûres d' ovraedje avou lès astaurdaedjes dsus nos voyes. Vos rindèz vos conte ? A môde di rin, si on s' disbrouye èt arindjî lès bidons po kça role mia, avou l' timps

rwangnî po bouter, on va polu co fé dès novias discrauchaedjes èt mète 5.625 chômeus d' pus à l' pwintresse...

DHL, va-t-i è rinde 3 o 4 di miyons d' Uros odobin pèter èvoye ?

Tins don, ça nos fait rapinser k'on djoû on Guypodimwinlannoû nos avéve promètu 300.000 plaeces di pus. I gn'a dèdjà sakants anêyes di ça. Avéve-ti tinu s' promesse, li ?

Asteure, on vwèt mwins grand. Lès promèteus d' bias djoûs n' cauzenut pus ki d' 200.000...

Mins, d' après lès dêrinnès statistiques, i gna, èl Walone Rêdjion, 258.961 djins à dmander d' l' ovraedje (20.384 di pus d' on an dsus l' ôte). Là ddins i n' sont "ki" 202.507 a "profiter" dès lårdjêsses do châmaedje. N' volati nén là dèdjà d' pus d' 56.000 à n' viker k' avou dès rikètes. Èvou sont lès plaeces à lzeu doner ?

L' lîve ki s' a l' mia vindu è l' Amèrike, ût samwinnes au lon, a dsus s' covèrte l' imaudje da Buxh, è s' mwin ène pougnîye di dolârs, sès lèbes clawêyes pa dès agrafes, dsus front "Ènron". Astoké à li, s' vice-Tchènêye, avou, dsus s' tièsse sins tchivias, "Apougne l' ôle". On wazêrêve ça vèci avou onk dès nosses ?